



Estatutos Federación Galega de Xadrez



Título I

Disposicións xerais

Capítulo primeiro

Denominación, natureza xurídica, obxecto social e domicilio

Artigo 1º

A Federación Galega de Xadrez (no sucesivo Fegaxa) é unha entidade privada, sen ánimo de lucro, con personalidade xurídica propia, cun ámbito territorial que comprende a Comunidade Autónoma de Galicia, para cumprimento dos fins que lle son propios. Está integrada polas entidades deportivas, deportistas, técnicos-adestradores, xuíces-árbitros e outros colectivos dedicados á práctica do deporte do xadrez. A Fegaxa, ademais das súas propias competencias, exerce por delegación funcións públicas de carácter administrativo e actúa como axente colaborador da Administración pública.

Artigo 2º

A Fegaxa organízase orgánica e funcionalmente de forma democrática e representativa, con personalidade xurídica e patrimonio propio e independente do dos seus asociados, e plena capacidade de obrar, coas limitacións sinaladas pola lei e disposicións vixentes, e pode adquirir, para os seus propios fins, bens de tódalas clases, mobles e inmobles, contratar e obrigarse para o cumprimento do seu obxectivo social e está suxeita ás súas propias responsabilidades.

A Fegaxa atópase integrada na Federación Española de Xadrez, e ostenta de maneira exclusiva a representación desta dentro da Comunidade de Galicia no referente ó deporte que constitúe o seu obxecto social, conservando en tal integración a súa personalidade xurídica, o seu patrimonio e diferenciado, o seu ornamento e o seu réxime xurídico particular. Dada a súa integración na Federación Española, está considerada como entidade de utilidade pública.

Artigo 3º

A Fegaxa non admite ningún tipo de discriminación por ela ou polos seus membros, por razón de nacemento, raza, sexo, opinión ou calquera outra condición ou circunstancia persoal ou social.

Artigo 4º

A Fegaxa ten como obxecto social promocionar, dirixir e ordenar con carácter exclusivo dentro de Galicia, sen prexuízo das competencias concorrentes das distintas administracións públicas, as actividades propias da súa especialidade deportiva, en coordinación cos organismos correspondentes da Xunta de Galicia, e rexerese polo disposto no Decreto 228/1994, do 14 de xullo, regulador das federacións deportivas galegas, a orde do 28 de xullo de 1995 pola que se desenvolve o decreto anterior, polos presentes estatutos e os seus regulamentos, polos da Federación Española de Xadrez, no que lle sexan aplicables, e polas disposicións que dicte a Xunta de Galicia e, supletoriamente, a Administración do Estado.

A Fegaxa é a única entidade competente dentro da Comunidade Autónoma de Galicia para promocionar, regulamentar, organizar, xestionar e controla-las competicións oficiais do deporte do xadrez, e son as súas principais modalidades as integradas nos estatutos e regulamentos da Fegaxa.

Artigo 5º

A Fegaxa, dentro da súa actividade na Comunidade Autónoma de Galicia, ademais das súas funcións propias de promoción, goberno, administración, xestión e organización do deporte que constitúe o seu obxecto social exercerá, baixo a coordinación e tutela da Dirección Xeral para o Deporte da Xunta de Galicia, as seguintes funcións públicas de carácter administrativo:

- A promoción e divulgación do deporte do xadrez en tódalas súas facetas.
- Canaliza-los deportistas á práctica do deporte do xadrez mediante os oportunos cursos de iniciación,



formación e perfeccionamento.

- Apoiar técnica e administrativamente a práctica do deporte do xadrez , velando ante os organismos competentes polo apoio a esta especialidade deportiva dentro de Galicia.
- Cualificar e organiza-las actividades e competicións deportivas oficiais de ámbito autonómico galego.
- Colaborar coa Administración do Estado e a Federación Española de Xadrez, nos programas e plans de preparación dos deportistas de alto nivel.
- Colaborar coas entidades competentes na formación dos técnicos deportivos especializados.
- Contribuir a prevención, control e represión do uso de substancias prohibidas e métodos non regulamentarios na práctica do deporte do xadrez.
- Colaborar na organización das competicións oficiais de ámbito estatal ou internacional que se celebren no territorio da Comunidade Autónoma de Galicia, de acordo cas normas e regulamentos autonómicos, nacionais e internacionais que lle sexan de aplicación.
- Exerce-la postestade disciplinaria sobre os integrantes da Fegaxa nos termos previstos na lei.
- Exerce-lo control das subvencións que se lles asignen ás asociacións e entidades deportivas nas condicións que fixe a Dirección Xeral para o Deporte.
- Executar, se é o caso, as resolucións do Comité Galego de Disciplina Deportiva.
- A representación de Galicia nas actividades e competicións deportivas de carácter estatal organizando as seleccións autonómicas.
- Calquera outra que lle sexa atribuída pola lexislación vixente ou que acorde no ámbito da súa competencia a asemblea xeral.

Os actos realizados pola Fegaxa no exercicio das funcións públicas de carácter administrativo son susceptibles de recurso ante o conselleiro da Presidencia e Administración Pública, as resolucións do cal esgotan a vía administrativa.

Artigo 6º

O domicilio social da Fegaxa establécese na cidade de Vigo, rúa Luis Ksado 17.

A comisión delegada, por maioría dos seus membros e cando as circunstancias o aconsellen, poderá acordar o cambio do domicilio social dentro da mesma cidade. Para o traslado do domicilio a outra cidade, que deberá ser sempre dentro do territorio da Comunidade Autónoma de Galicia, será necesario o acordo maioritario da asemblea xeral. En ámbolos casos, o traslado do domicilio social deberalles ser notificado ós afiliados e á Dirección Xeral para o Deporte.

Por acordo da asemblea xeral, e para efectos puramente de organización interna, poderanse establecer delegacións da Fegaxa nas localidades de Galicia que decida a citada asemblea.



Capítulo segundo

Requisitos para ser membro da federación. Dereitos e deberes.

Artigo 7º

Os clubs deportivos poderán integrarse, por petición propia, na Fegaxa sempre que teñan o seu domicilio social e desempeñen a súa actividade en Galicia e se atopen constituídos conforme os requisitos esixidos para cada modalidade pola lexislación vixente e inscritos na Fegaxa e se inscriban no Rexistro de Clubs, Federacións e Asociacións Deportivas da Xunta de Galicia, debendo comprometerse a cumprir os estatutos e regulamentos da Fegaxa e someterse á autoridade dos órganos federativos, en relación coas materias da súa competencia.

Os mesmos criterios e requisitos, no que sexa de aplicación, rexerán para a integración na Fegaxa dos deportistas, técnicos, adestradores, xuíces e árbitros.

Artigo 8º

A integración da Fegaxa levará consigo a integración automática e para tódolos efectos na federación española da mesma especialidade deportiva.

Artigo 9º

A integración na Fegaxa producirase mediante expedición por parte desta da correspondente licenza federativa ou documento de afiliación ou inscrición. A dita expedición será acordada pola xunta directiva da federación galega. Contra a denegación, que deberá ser motivada, caberá recurso ante a asemblea xeral. En todo caso, para a participación en actividades ou competicións deportivas oficiais de ámbito autonómico será preciso estar en posesión da licenza ou documento de afiliación expedido pola Fegaxa.

Artigo 10º

Tódolos membros da Fegaxa teñen dereito a recibir a tutela dela con respecto ós seus intereses deportivos comúns e individuais, así como o de participar nas súas actividades e no funcionamento dos seus órganos, de acordo cos presentes estatutos e cos regulamentos internos daquela. Os membros da Fegaxa teñen, a súa vez, o deber de acatar os acordos dos seus órganos, sen que iso obste ó seu dereito de recorrer, ante as instancias federativas competentes, e se é o caso, ante os tribunais de xustiza ou Dirección Xeral para o Deporte, segundo proceda, contra aqueles que consideren contrarios a dereito, e sen prexuízo de acudir á conciliación extraxudicial ou arbitraje nos termos previstos nas leis.

Artigo 11º

As entidades deportivas, os deportistas, os técnicos-adestradores e os xuíces-árbitros, sen prexuízo da súa pertenza e afiliación directa na Fegaxa, poderán agruparse en asociacións deportivas, con ou sen personalidade xurídica propia, que á súa vez estarán integradas necesariamente na Fegaxa.



Capítulo terceiro

Estructura Territorial

Artigo 12º

A Fegaxa estruturarase territorialmente en delegacións, cando así o decida a asemblea.

Cada delegación quedará integrada polos clues, deportistas, adestradores e xuíces-árbitros que correspondan dentro dun ámbito geográfico común, utilizándose preferentemente o establecido nas leis galegas.

Artigo 13º

As delegacións axustarán a súa actividade ás normas dictadas pola Fegaxa a través dos seus órganos que correspondan e, sinaladamente, do seu presidente.

Artigo 14º

Os titulares das delegacións serán nomeados e separados do corpo polo presidente da Fegaxa, de acordo co artigo 34 dos presentes estatutos.

A composición do equipo directivo da delegación e a competencia del será de libre facultade do titular da delegación, o cal lle dará conta ó presidente da Fegaxa.



Título II

Dos órganos de gobierno e representación.

Capítulo primeiro

Normas xerais

Artigo 15º

Son órganos de goberno e representación da Fegaxa a asemblea xeral e o presidente.
No seo da asemblea xeral deberá constituirse unha comisión delegada de asistencia a ela.

Artigo 16º

Serán órganos electivos da Fegaxa o presidente, a asemblea xeral e a comisión delegada no ámbito das súas respectivas competencias.

Os membros dos demais órganos e comités serán designados e apartados libremente polo presidente coas excepcións previstas nos presentes estatutos.

- O nomeamento ou a separación dos membros dos órganos de goberno e representación, dos órganos complementarios, e dos comités que puidesen crearse dentro da Fegaxa, deberán ser comunicados a tódolos membros da asemblea xeral e á Dirección Xeral para o Deporte nun prazo máximo de 15 días a partir da data do nomeamento.
- Os órganos de goberno e representación da Fegaxa reuniranse na forma e nos termos establecidos nestes estatutos; os seus acordos, salvo disposición expresa que dispoña o contrario, adoptaranse por maioría simple; no caso de empate, o presidente terá voto de calidade. Os acordos poderán ser impugnados de conformidade co disposto na lexislación aplicable e nos presentes estatutos.
- A responsabilidade dos membros dos órganos da Fegaxa no exercicio das súas funcións será esixida no ámbito disciplinario de conformidade co disposto no Real decreto 1591/1992, do 23 de decembro, e nos ámbitos administrativo, civil e penal de acordo coa lexislación xeral de aplicación.
- Son requisitos xerais para ser membro de calquera órgano da Fegaxa, sen prexuízo do establecido regulamentariamente, os seguintes:
- Te-la condición de cidadán de Galicia, segundo do disposto no artigo 3 da Lei orgánica 1/1981, do 6 de abril, do Estatuto de autonomía de Galicia.
- Ser maior de idade e estar en pleno uso dos dereitos civís.
- Non estar suxeito a corrección disciplinaria de carácter deportivo que o inhabilite.
- Non ter sido condenado mediante sentenza penal firme que leve anexa pena principal ou accesoria de inhabilitación absoluta ou especial para cargo público.
- Non estar incurso en ningunha causa de incompatibilidade establecida legalmente ou nos presentes estatutos.
- Reuni-los requisitos específicos propios de cada estamento deportivo.



Capítulo segundo Da asemblea xeral Sección primeira

Natureza, composición, nomeamento e cesamento

Artigo 17º

A asemblea xeral é órgano superior de goberno e representación da Fegaxa.

Artigo 18º

A asemblea xeral estará constituída polo presidente da federación e polos representantes dos clubs deportivos, dos deportistas, dos técnicos-adestradores e dos xuíces-árbitros.

As entidades deportivas non poderán ser membros da asemblea xeral se no momento de convocatoria de eleccións non figuran inscritas cunha antigüidade de dous anos, polo menos, no rexistro da Fegaxa, e se inscriban no Rexistro de Clubs, Federacións e Entidades Deportivas da Xunta de Galicia.

Os compoñentes da xunta directiva, por este só carácter, poderán asistir ás reunións da asemblea, con dereito a voz pero sen voto.

Artigo 19º

A asemblea xeral está composta polo número de membros resultantes, en cada un dos estamentos, segundo as seguintes porcentaxes:

- a) Representantes de Clubs: entre ó 60% e ó 75%.
- b) Representantes de Deportistas: entre ó 20% e ó 30%.
- c) Representantes de Xuíces-Árbitros: entre ó 5% e ó 10%.
- d) Representantes de Adestradores-Técnicos: entre ó 5% e ó 10%.

Artigo 20º

A convocatoria de eleccións deberá indicar expresamente o porcentaxe de membros da asemblea xeral e o de cada un dos estamentos.

Artigo 21º

Os membros da asemblea xeral e da comisión delegada cesarán polas seguintes causas:

Defunción.

Disolución da entidade á que representan ou baixa na Fegaxa.

Expiración do mandato para o que foron elixidos.

Renuncia voluntaria ou demisión.

Estar incursos en causa de inelixibilidade ou incompatibilidade legal ou estatutaria.

Sanción disciplinaria imposta en forma regulamentaria que implique o cesamento no cargo que exercen.

Artigo 22º

As vacantes que se produzan na asemblea xeral antes das seguintes eleccións xerais a ela serán cubertas, dentro de cada estamento e de maneira sucesiva, polos candidatos que no proceso electoral obtivesen maior número de votos despois dos que resultaron electos e, a falta destes, mediante a realización de eleccións parciais sempre que, neste último caso, as vacantes superen o 20% dos membros da asemblea.

Os elixidos para ocuparen as vacantes a que se refire o apartado anterior exercerán o seu mandato polo tempo que falte para a celebración das seguintes eleccións xerais.



Sección segunda

Réxime de funcionamento

Competencias.

Artigo 23º

A asemblea xeral, como órgano máximo de goberno e representación da Fegaxa, pode adoptar calquera acordo ou decisión sobre ela, con sometemento ás regras de competencia e procedemento. Especialmente, son competencias da asemblea xeral as seguintes:

- A aprobación dos estatutos da Fegaxa.
- A elección mediante sufraxio libre, igual, directo e secreto do presidente e da comisión delegada da Fegaxa, así como dispoñe-lo cesamento deles e a moción de censura ó presidente.
- Aprobación e liquidación do orzamento anual da Fegaxa.
- Aprobación do programa ou calendario deportivo anual que vai desenvolver-la Fegaxa e das bases ou regulamentos que rexerán a competición.
- Aprobación da creación de órganos territoriais da Fegaxa.
- Aprobación do Regulamento de eleccións á asemblea xeral, a presidente e á comisión delegada da Fegaxa.
- Aprobación do regulamento sobre conciliación extraxudicial ou arbitraje.
- Aprobación do regulamento de disciplina deportiva.
- Calquera outra competencia da Fegaxa que non lle estea expresamente atribuída polos presentes estatutos a outro órgano.

Convocatoria

Artigo 24º

A asemblea xeral será convocada polo presidente da Fegaxa cun mínimo de 10 días naturais de antelación á data da súa celebración, no taboleiro de anuncios da Fegaxa, e deberá incluír necesariamente os puntos do orden do día que se van tratar, ademais da notificación persoal a cada un dos membros ó domicilio que deberá constar na federación 30 días antes da convocatoria; a notificación remitirase por calquera medio que permita ter constancia da recepción que terá lugar cunha antelación mínima de corenta e oito horas á hora da reunión.

Os defectos formais na convocatoria non darán lugar á nulidade sempre e cando os membros dela recibisen a convocatoria coa orde do día no prazo establecido e, en todo caso, a asemblea será válida, sen necesidade de ningún outro requisito, sempre que concorran a totalidade dos membros dela.

A orde do día será notificada no sentido de incorporar novos puntos por petición fundada dun quinto dos membros da asemblea xeral e sempre que esta incorporación se solicite cunha marxe de tempo suficiente para que lles poida ser notificada a tódolos membros da asemblea xeral mediante a notificación e a publicación no taboleiro de anuncios da Fegaxa cunha antelación mínima de 3 días á data da celebración.

Artigo 25º

O presidente da Fegaxa deberá convocar unha asemblea xeral ordinaria anualmente dentro dos tres primeiros meses do ano e sempre antes do comenzo da tempada deportiva oficial, para trata-los asuntos propios da xestión ordinaria e, como mínimo, para a aprobación da memoria anual de actividades, a aprobación do novo



orçamento e a liquidación do anterior, aprobación do calendario deportivo e das regras que rexerán a competición e o exame e consideración das propostas que formulen os membros da asemblea xeral, da comisión delegada, da xunta directiva e o presidente.

Tódalas demais asembleas terán carácter extraordinario e serán convocadas polo presidente da Fegaxa sempre que o coide oportuno, ou por petición dun número de membros que integran a asemblea xeral non inferior ó 25%. Neste caso, os solicitantes deberán formular unha petición por escrito dirixida ó presidente da Fegaxa na que indiquen os puntos que comporán a orde do día. O presidente, no prazo máximo de 10 días naturais desde a entrada da petición no rexistro da Fegaxa, deberá convoca-la asemblea xeral con carácter extraordinario, cos requisitos sinalados nestes estatutos, e coa orde do día solicitada, sen incluír ningún outro punto, que se celebrará nun prazo non superior a 20 días naturais desde a convocatoria. No caso de negativa expresa do presidente a efectua-la convocatoria, ou pasados 10 días desde que a solicitude fose efectuada sen ser respondida, os solicitantes poderán facer uso dos dereitos que a lexislación vixente establece, co fin de que a Dirección Xeral para o Deporte convoque os órganos colexiados de goberno, garantindo así o cumprimento efectivo das funcións encomendadas ás federacións.

Cando o presidente da Fegaxa aprecie a existencia dunha situación urxente que non permita demora na convocatoria da asemblea extraordinaria, poderá convocala sen suxeición a prazo nin requisito de forma ningún agás a citación persoal dos asembleístas que poidan ser localizados nos domicilios que consten na Fegaxa. En todo caso, a asemblea requirirá como mínimo a presenza de 2/3 dos seus membros e antes de analiza-la orde do día pronunciarse previamente, por maioría de asistentes, sobre a urxencia da convocatoria e a necesidade ou non da súa celebración. A asemblea xeral convocada desta forma non poderá modifica-los estatutos.

Constitución

Artigo 26º

A asemblea xeral quedará válidamente constituída en primeira convocatoria cando a ela concorran a maioría dos seus membros.

En segunda convocatoria será válida sexa cal sexa o número de asistentes. Deberá mediar un mínimo de media hora entre a primeira e a segunda convocatorias.

Adopción de acordos

Artigo 27º

Non será admisible de ningún xeito para a formación da vontade dos órganos colexiados da Fegaxa nin para o establecemento do seu quórum o voto por correo nin a delegación de voto; é, por tanto, necesaria a presenza física dos seus membros. Exceptúanse as eleccións dos membros da asemblea xeral, se así se aprobase no regulamento electoral.

Con carácter excepcional, os clubs deportivos poderán ser representados de conformidade cos seus propios estatutos, pero o representante non poderá ser membro da asemblea xeral. Ninguén poderá ostentar na asemblea xeral máis dunha delegación de voto.

Artículo 28º

As votacións no seo da asemblea xeral realizaranse na forma e pola orde que a presidencia estableza; é esta a que ten que decidir se teñen que ser ordinarias, nominais ou secretas; se polo menos o 25% dos asistentes solicita unha modalidade determinada, a forma de votación decidirase por maioría simple dos membros da asemblea xeral.

Artigo 29º

A asemblea xeral será presidida polo presidente da Fegaxa, e o seu voto será de calidade no caso de empate. Os acordos adoptaranse por maioría simple de asistentes.



Para os efectos de cómputo de quorums e maiorías, cando estes se conformen cun número inexacto de assembleístas, computaranse sempre por exceso e con referencia ó número daqueles efectivamente existentes como membros da asemblea, descontadas as vacantes.

Artigo 30º

De tódolos acordos adoptados na asemblea xeral e na comisión delegada, levantará acta o secretario delas, especificando o nome das persoas que intervisen e as demais circunstancias que se consideren oportunas, o contido dos acordos adoptados, o resultado da votación e, se é o caso, os votos particulares contrarios ó acordo adoptado.

Os votos contrarios ó acordo adoptado ou as abstencións motivadas eximirán ós que os emitan de calquera responsabilidade derivada de tales acordos.

Artigo 31º

Os acordos da asemblea xeral e da comisión delegada serán vinculantes e de obrigatorio cumprimento para a totalidade dos órganos, persoas e entidades que integran a Fegaxa e terán forza executiva a partir da data da súa adopción.

Artigo 32º

A asemblea xeral non poderá adoptar ningún acordo ou realizar ningún acto que poida comprometer de forma irreversible o seu patrimonio ou a actividade que constitúe o obxecto propio da Fegaxa.

No caso de dúbida ou por petición dun 5% dos membros de dereito da asemblea, será requisito imprescindible a emisión dun informe favorable por parte dos organismos competentes da Xunta de Galicia.



Capítulo terceiro

Da comisión delegada

Natureza, constitución, composición e funcionamento

Artigo 33º

1. No seo da asemblea xeral deberá constituirse unha comisión delegada que terá carácter electivo e será un órgano de goberno e representación da Fegaxa.

2. A comisión delegada será elixida pola asemblea xeral na primeira reunión que esta celebre despois da súa constitución mediante sufraxio entre os membros dela. O seu mandato coincidirá co da asemblea xeral.

- O número de membros da comisión delegada non será inferior a cinco nin superior a quince, debendo estar representados tódolos estamentos, respectándose a proporcionalidade da asemblea xeral.
- O presidente da Fegaxa convocará á comisión delegada, que se reunirá, como mínimo, cada 4 meses para os fins da súa competencia e polo menos para realiza-lo seguimento da xestión deportiva e económica da Fegaxa.
- Correspóndelle á comisión delegada da asemblea xeral:
 - A elaboración dun informe previo á aprobación dos orzamentos.
 - A modificación do calendario deportivo.
 - A modificación dos orzamentos e dos regulamentos.
 - O seguimento da xestión deportiva e económica da Fegaxa.

As modificacións no poderán exceder dos límites e criterios que a propia asemblea xeral estableza.

A proposta sobre os temas que se van tratar na comisión delegada correspóndelle ó presidente ou a dous tercios da comisión delegada.



Capítulo cuarto Do presidente

Artigo 34º

O presidente da Fegaxa é o órgano de goberno e representación que exerce a súa representación legal, convoca e preside os órganos de goberno e representación e executa os acordos deles. O presidente poderá nomear delegados nas localidades aprobadas pola asemblea xeral, que actuarán seguindo as instrucións daquel e por delegación nas funcións que se lle encomenden. Os ditos delegados poderán ser apartados ou substituídos polo presidente segundo o seu criterio.

Artigo 35º

A duración do cargo de presidente será de 4 anos.

No caso de que, excepcionalmente, quede vacante a presidencia antes de que transcorra o prazo para o que foi elixido, considerarase demisionaria toda a xunta directiva, e constituirase a comisión delegada en comisión xestora, presidida polo membro de maior idade. Convocará a asemblea xeral, e esta acordará unha nova elección do presidente para cubri-la vacante polo tempo que falte ata o remate do prazo correspondente ó mandato ordinario. Se a vacante se produce por prosperar unha moción de censura, haberá que aterse ó disposto no artigo 38 destes estatutos.

Artigo 36º

O desempeño do cargo de presidente será causa de incompatibilidade coas seguintes actividades:

- Ocupación de cargos directivos noutras federacións deportivas; exceptuándose a federación española da mesma especialidade deportiva.
- Desenvolvemento de actividades ou desempeño de cargos en asociacións deportivas, ou clubs dependentes integrados na Fegaxa.
- A persoa que resulte elixida como presidente da Fegaxa deberá cesar en todo tipo de actividades directivas no deporte específico e no ámbito territorial da Fegaxa.

Non existirá incompatibilidade, en ningún caso, coa práctica activa do deporte.

Artigo 37º

O presidente cesará por:

- Transcurso do prazo polo que foi elixido.
- Demisión
- Incapacidade física ou psíquica para continuar no exercicio do seu cargo.
- Aprobación dunha moción de censura pola asemblea xeral.
- Por incorrer en causa de inellexibilidade ou incompatibilidade. Neste último caso, disporía do prazo dun mes para cesar no posto que resulte incompatible co de presidente.

Artigo 38º

A moción de censura ó presidente poderá ser presentada polos membros da asemblea xeral que constitúan polo menos un 25% dela mediante escrito motivado e asinado individualmente por cada un dos proponentes, no que se acredite suficientemente a lexitimación dos que a promoven, presentando o dito escrito no rexistro da Fegaxa. Na mencionada petición deberán solicitar do presidente a convocatoria dunha asemblea xeral extraordinaria coa dita moción como único punto da orde do día, así como propor un candidato alternativo á presidencia. Para poder prospera-la moción de censura, deberá ser apoiada pola maioría absoluta dos



membros de pleno dereito que integran a asemblea xeral.

Para a convocatoria da asemblea xeral extraordinaria a que se refire este artigo, haberá que averse ó disposto no artigo 24º destes estatutos. A sesión da asemblea xeral na que se debata a moción de censura estará presidida polo membro de maior idade dos presentes que non estea suxeito a moción nin elevase ninguna. Non será válido o voto por correo nin a asistencia por representación. Se a moción de censura non prosperase, non podería presentarse unha nova moción ata transcorrido un ano desde a última presentada.



Título III

Órganos complementarios dos de goberno e representación

Artigo 39º

Són órganos complementarios dos de goberno e representación da Fegaxa, para asistir ó presidente:

A xunta directiva

O secretario xeral

O tesoureiro

Artigo 40º

1. A xunta directiva é o órgano colexiado de xestión da Fegaxa. Os seus membros serán designados e separados libremente polo presidente.

Estará composto polo número de membros que determine o seu presidente, que non poderá ser inferior a 5 nin superior a 15:

O presidente elixirá entre os membros da xunta directiva alomenos un vicepresidente, que o será tamén da Fegaxa, quen substituirá ó presidente por delegación, imposibilidade física ou ausencia temporal; un secretario que, á súa vez, o será da Fegaxa, así como o tesoureiro. Tales cargos, por estaran baseados na confianza, poderán ser removidos polo presidente cando o considere conveniente.

Os membros da xunta directiva que non o sexan da asemblea xeral terán acceso ás sesións dela, con dereito a voz pero sin voto.

A xunta directiva poderá constituirse, por motivos de urxencia e coas mesmas facultades desta, en comisión permanente; a súa convocatoria, composición e número de membros, que non será inferior a cinco, será decidida, para cada caso, polo presidente da Fegaxa.

A convocatoria da reunión da xunta directiva correspóndelle ó presidente, e poderá facelo en tantas ocasións como considere oportuno, determinando os asuntos da orde do día de cada sesión. O prazo mínimo de convocatoria será de 48 horas.

Os cargos non serán remunerados e, no caso de establecerse unha compensación económica a favor dalgún dos membros da xunta directiva, deberá ser expresamente acordada pola maioría absoluta da asemblea xeral e constar de maneira diferenciada no orzamento. En ningún caso a compensación económica poderá ser satisfeita con cargo as subvencións públicas que reciba a Fegaxa.

2. O presidente da Fegaxa nomeará un secretario, o cal exercerá as funcións de fedatario e asesor, e máis especificamente:

- Redactar actas das sesións dos órganos de goberno e representación da Fegaxa, con indicación dos asistentes, temas tratados, o resultado das votacións e, se é o caso, os votos particulares contrarios ó acordo adoptado.
- Expedir as certificacións oportunas das actas dos órganos de goberno e representación.
- Remitirlle á Dirección Xeral para o Deporte as actas das reunións da asemblea xeral e da comisión delegada no prazo de 15 días desde a data da súa celebración, así como as convocatorias delas.
- Cantas funcións lle encomenden os estatutos e regulamentos da Fegaxa, ou lle sexan delegadas polo presidente.



3. O tesoureiro da Fegaxa é o órgano de administración dela. Exercerá como funcións propias:

- Leva-la contabilidade da Fegaxa.
- Exerce-la inspección económica de tódolos órganos da Fegaxa.
- Elaborar e presentar informes a comisión delegada do estado contable da Fegaxa.
- Calquera outra función que lle encomenden os estatutos e regulamentos da Fegaxa.

Artigo 41º

Os membros da xunta directiva cesarán polas seguintes causas:

- Vacancia da presidencia, sen prexuízo da súa conversión en comisión xestora nos casos previstos nestes estatutos.
- Demisión.
- Falecemento ou incapacidade física ou psíquica para continuar no exercicio do seu cargo.
- Por incorrer en causa de inelixibilidade ou incompatibilidade.
- Separados directamente polo presidente co cumprimento das comunicacións a que se refiren os presentes estatutos.

Artigo 42º

A xunta directiva, como órgano colaborador do presidente, non terá competencias propias e exercerá, por delegación, as que lle encomende o presidente, que poderá avocar e revogar en calquera momento.

Artigo 43º

Os asuntos ordinarios de trámite serán despachados polo presidente e o secretario.



Título IV Dos órganos técnicos e asesores

Capítulo primeiro Comisións en xeral

Artigo 44º

A Fegaxa poderá crear, logo de aprobación pola asemblea xeral, cantas comisións técnicas precise, ademais das seguintes:

- Os comités de disciplina deportiva: comité de competición ou xuíz único e comité de apelación.
- Comité de xuíces-árbitros.
- Comité de adestradores.
- Comité de torneos.
- Comisión do Circuito Galego de Xadrez.

Tódalas comisións se rexerán polos seus respectivos regulamentos internos e, se é o caso, pola normativa nacional unificada emanada da federación española da mesma especialidade, pola lexislación aplicable e polo disposto nos presentes estatutos.



Capítulo segundo

Comité de xuíces-árbitros

Artigo 45º

No seo da Fegaxa constituirase, de maneira obrigatoria, un comité de xuíces ou árbitros, o presidente do cal será designado polo presidente da Fegaxa.

Serán funcións deste comité:

- Establece-los niveis de formación arbitral.
- Clasificar técnicamente os xuíces ou árbitros, propóndolle á xunta directiva a adscrición ás categorías correspondentes. Estas clasificacións comunicaráselle á asemblea xeral.
- Propo-los candidatos a xuíces ou árbitros nacionais.
- Proporlle á xunta directiva as normas administrativas que regulan a arbitrase, para a súa posterior aprobación pola asemblea xeral.
- Designa-los colexiados nas competicións oficiais de ámbito galego.
- Colaborar cos órganos competentes da Fegaxa.



Capítulo terceiro

Comité de adestradores

Artigo 46º

O comité de adestradores da Fegaxa é un órgano técnico que ten por obxecto a formación, capacitación, actualización e dirección dos adestradores de xadrez.

Serán funcións deste comité:

- A colaboración coa Administración pública competente na formación de técnicos deportivos.
- O estudo e a actualización das diferentes técnicas e sistemas de ensino e adestramento, profesores e adestradores.
- A organización de cursos e xornadas que redunden no perfeccionamento e actualización permanente dos técnicos deportivos.
- Manter contactos e relacións con outras entidades de carácter nacional e internacional para intercambio de coñecementos e información.
- Censar e reunir a tódolos técnicos titulados, velando polo seu prestixio profesional.
- A divulgación da teoría e práctica do xadrez e cantos outros coñecementos contribúan o desenvolvemento deste deporte.
- Todas aquelas que lle encarge a Fegaxa de acordo coa súa natureza.

Tódolos presidentes dos comités serán nomeados polo presidente da federación. O secretario da federación intervirá como secretario de tódolos comités sen voz e sen voto, agás que fose membro deles.

Estes comités poderán adoptar a estrutura territorial da Fegaxa.



Capítulo cuatro Escola galega

Artigo 47º

A Escola Galega de Xadrez, (en adiante a Escola), é un estamento constituído baixo os auspicios da dita federación, constituíndo un estamento dentro da Fegaxa, con capacidade de obrar dentro dos presentes estatutos.

- A Escola é unha entidade especializada no ensino do deporte do xadrez, ó mesmo tempo que procurará dentro da dita actividade a súa promoción, especialmente a nivel divulgativo, ben a través de cursos ou de publicacións de calquera tipo.
- Ocuparase da formación de deportistas e técnicos de cara á obtención das titulacións que marca a lei e das propias da Fegaxa.
- A Escola ten potestade para crea-las súas propias publicacións e para o ensino, tanto teórico coma práctico das modalidades deportivas amparadas na Fegaxa ou que nun futuro desenvolva.
- A Escola estará nas instalacións da propia Fegaxa, sen prexuízo de poder trasladarse a outras dependencias se as circunstancias así o aconsellansen.
- A Escola poderá expedir aquelas titulacións que por lei sexan potestade da Fegaxa, ou outras de propia creación sempre que estas non atenten contra a lexislación vixente nesta materia.

A Escola da Fegaxa contará co seguinte cargo: Un director.

- O director da Escola será nomeado polo presidente da Fegaxa libremente entre persoas que non exerzan ningún cargo directivo ni técnico en ningún club ou entidade deportiva da Fegaxa.
- O cambio ou cesamento do director decidirao o presidente da Fegaxa; se é o caso, cesará todo o equipo nomeado polo director saínte.

A Escola terá unha asignación anual por parte dos orzamentos xerais da Fegaxa. A Escola poderá buscar recursos propios, a través do cobro das súas actividades, ou por outras vías, sempre que estas non estean en contraposición co estipulado nestes estatutos, ou como consecuencia das leis vixentes.

A Escola Galega rexerese por seu propio regulamento.



Título V Régime electoral

Capítulo primeiro Os censos

Artigo 48º

Comporán os censos correspondentes a cada estamento electoral tódolos membros da Fegaxa que reúnan os requisitos establecidos para cada estamento nos presentes estatutos e no regulamento electoral.

Capítulo segundo Regulamento electoral

Artigo 49º

Os procesos electorais desenvolveranse conforme o Regulamento electoral que deberá ser aprobado pola asemblea xeral, por proposta do presidente, e deberá regula-las seguintes cuestións:

- Proporcionalidade de membros da asemblea xeral; circunscrición electoral e número de representantes que por cada circunscrición electoral corresponda a cada un dos estamentos.
- Calendario electoral.
- Censo electoral.
- Composición, competencias e funcionamento da xunta electoral.
- Requisitos para a presentación e proclamación dos candidatos. O termo para a presentación de candidatos a presidente e membros da asemblea xeral non poderá ser inferior a 10 días.
- Procedemento de resolución de conflitos, impugnacións e reclamacións así como os recursos electorais.
- Regulación do voto por correo nas eleccións á asemblea xeral. Non se admitirá esta clase de voto nas eleccións á comisión delegada e a presidente.
- Composición, competencia, funcionamento e localización das mesas electorais.
- Elección de presidente.
- Elección de comisión delegada.

O Regulamento electoral deberá ser ratificado pola Dirección Xeral para o Deporte.



Capítulo terceiro A comisión xestora.

Artigo 50º

Acordada a convocatoria de eleccións pola asemblea xeral e aprobado o Regulamento electoral, o presidente procederá no prazo sinalado nel á convocatoria de eleccións á asemblea xeral. A partir dese momento, a xunta directiva e o presidente constituiranse en comisión xestora, e someterán o Regulamento electoral á ratificación pola Dirección Xeral para o Deporte.

A comisión xestora garantirá a máxima difusión e publicidade das convocatorias de eleccións á asemblea xeral e a presidente, así como do Regulamento electoral coas medidas previstas nas disposicións federativas a través dun medio que permita asegura-la recepción da dita notificación. Deberá exporse o regulamento electoral en cada circunscrición electoral o mesmo día da convocatoria. A comisión xestora administrará a Fegaxa e convocará e realizará novas eleccións no prazo máximo de tres meses no caso de que non se presentase ningunha candidatura ou non fose válida ningunha das presentadas.

Capítulo cuarto Circunscrición electoral

Artigo 51º

A circunscrición electoral determinarase en función do número de membros de cada estamento e na forma que estableza o Regulamento electoral.

Capítulo quinto Xunta electoral

Artigo 52º

1. A xunta electoral estará composta por tres membros titulares e tres suplentes que se elixirán na asemblea xeral entre persoas que non sexan candidatos por sorteo entre aqueles que presenten a súa candidatura. De non haber suficientes candidatos, o presidente da federación proporalle á asemblea os membros necesarios para completar a xunta electoral.

2. De entre os membros designados, o presidente será o de maior idade, e actuará como secretario o de menor idade. Poderá asistir á xunta electoral como secretario de actas un membro da federación con voz e sen voto, designado pola asemblea xeral.

- Os membros da xunta electoral deberán ser maiores de 18 anos, ter o título de bacharelato superior ou equivalente, non ter relación conractual ou profesional coa Fegaxa e non poderán figurar como candidatos á asemblea xeral nin á presidencia da Fegaxa.
- A xunta electoral controlará todo o proceso e terá competencia para coñecer e resolve-las incidencias que se produzan sobre o censo electoral, presentación e proclamación de candidatos, proclamación de membros da asemblea xeral e comisión delegada e do presidente da Fegaxa, así como a decisión de calquera outra cuestión que afecte directamente á celebración das eleccións e ós seus candidatos. Unha vez finalizada a votación, levantará acta da votación e do recuento e remitirá a acta á Dirección Xeral para o Deporte no prazo máximo de 3 días.
- As decisións da xunta electoral son executivas e formaranse por maioría de votos. En casos de empate, o voto do presidente terá carácter dirimente.



- Unha vez concluído o proceso electoral da asemblea xeral, do presidente da Fegaxa e da comisión delegada, a xunta electoral disolverase.

Capítulo sexto

Mesa electoral

Artigo 53º

Para a elección dos distintos estamentos da asemblea xeral, constituirase unha ou varias mesas electorais na forma establecida, con tres membros titulares e tres suplentes elixidos por sorteo pola xunta electoral entres as persoas físicas que pertencen ó censo electoral correspondente a cada mesa. Serán presidente e secretario os membros de maior e menor idade, respectivamente.

Capítulo sétimo

Recursos

Artigo 54º

As reclamacións e impugnacións que se presenten contra calquera acto electoral dirixiranse á xunta electoral e contra o que esta resolva caberá recurso ante o Comité Galego de Disciplina Deportiva. Así mesmo, caberá recurso ante o Comité Galego de Disciplina Deportiva contra tódolos actos, acordos ou resolucións da xunta electoral ou calquera outro órgano ou membro da Fegaxa en materia electoral.

Capítulo oitavo

Elección da asemblea xeral

Artigo 55º

- Os membros da asemblea xeral serán elixidos cada catro anos coincidindo cos Xogos Olímpicos de inverno, mediante sufraxio libre, secreto, igual e directo entre e polos componentes dos distintos estamentos da Fegaxa.
- As eleccións á asemblea xeral serán acordadas por ela, que aprobará a convocatoria con tódolos requisitos que se establezan no Regulamento electoral que así mesmo se aprobe.
- Acordada pola asemblea xeral a convocatoria de eleccións, o acordo será formalmente executado polo presidente da Fegaxa, quen a asinará.
- Desde a convocatoria para a celebración desta asemblea xeral, a xunta directiva e o presidente constituiranse en comisión xestora, de acordo co disposto no artigo 50º dos presentes estatutos.

Artigo 56º

Para ser candidato a membro da asemblea xeral requírese o cumprimento dos requisitos establecidos con carácter xeral no artigo 16.5º destes estatutos.

Os requisitos esixidos para ser elector ou elixible deberán terse cumpridos no día en que se publique a convocatoria de eleccións.



Artigo 57º

As eleccións á asemblea xeral realizaranse para cada un dos postos correspondentes ós estamentos integrantes dela de acordo co previsto nestes estatutos.

Artigo 58º

Os representantes dos clubs deportivos na asemblea xeral serán elixidos por e entre os representantes dos correspondentes a cada circunscrición electoral dos que integran o censo de clubs deportivos inscritos no rexistro público da Fegaxa e no Rexistro de Clubs, Federacións e Asociacións Deportivas da Xunta de Galicia, no momento da convocatoria das eleccións, e que estivesen igualmente inscritos durante a tempada deportiva anterior, sempre que participasen en competicións ou actividades de carácter oficial organizadas pola Fegaxa ou pola Federación Española de Xadrez coa aprobación ou intervención daquela.

Artigo 59º

Os representantes dos deportistas na asemblea xeral serán elixidos por e entre os maiores de 18 anos correspondentes a cada circunscrición electoral dos que teñan licencia en vigor expedida pola Fegaxa no momento da convocatoria das eleccións e tamén a tivesen, polo menos, durante a tempada deportiva anterior, sempre que participasen en competicións ou actividades de carácter oficial organizadas pola Fegaxa ou pola Federación Española de Xadrez, coa aprobación ou intervención daquela.

Artigo 60º

Os representantes dos técnicos-adestradores e dos xuíces-árbitros na asemblea xeral serán elixidos por e entre os pertencentes a cada estamento calquera que sexa a súa categoría, dos que teñan licencia en vigor no momento da convocatoria de eleccións e tamén a tivesen, como mínimo, na tempada deportiva inmediatamente anterior, sempre que participasen en competicións ou actividades de carácter oficial organizadas pola Fegaxa ou pola Federación Española de Xadrez, coa aprobación ou intervención daquela.

Capítulo noveno

Elección de presidente

Artigo 61º

Unha vez concluídas as eleccións á asemblea xeral e de acordo co calendario electoral establecido, o presidente da comisión xestora, logo de acordo dela, procederá inmediatamente á convocatoria da dita asemblea para elixi-lo presidente e a comisión delegada da Fegaxa.

O presidente será elegido para un período de catro anos, coincidido cos anos en que se celebren Xogos Olímpicos de inverno pola asemblea xeral, mediante sufraxio libre, directo, igual e secreto por tódolos membros de dita asemblea xeral logo de presentación e aceptación das candidaturas correspondentes que deberán estar avaladas, alomenos polo 10% dos membros da asemblea xeral. Os candidatos a presidente poderán non ser membros da asemblea xeral.

Artigo 62º

Será elixido presidente o candidato que obteña o maior número de votos emitidos.

No suposto de que se presentase un só candidato, non se efectuará votación, e será proclamado presidente o único candidato pola Dirección Xeral para o Deporte.

Artigo 63º

Para poder ser candidato a presidente da federación, deberán reunirse as seguintes condicións:

- Te-la condición de cidadán de Galicia, segundo o que dispón o Estatuto de autonomía.



- Ser maior de idade e estar en pleno uso dos dereitos civís.
- Non estar incurso en ningunha sanción deportiva que o inhabilite, dictada polos órganos disciplinarios da Fegaxa ou polo Comité Galego de Disciplina Deportiva.
- Non ter sido condenado mediante sentenza judicial firme que leve anexa pena principal ou accesoria de inhabilitación absoluta ou especial para o desempeño de cargos públicos.

Artigo 64°

A votación será libre, igual, secreta e directa, e non se admitirá o voto por correo, nin por delegación das persoas físicas.

Capítulo décimo

Elección da comisión delegada

Artigo 65°

Na mesma asemblea xeral convocada para a elección do presidente, e unha vez realizada esta, procederase á elección dos membros da comisión delegada da asemblea xeral.

A comisión delegada estará composta por un mínimo de 5 membros e ademais o presidente da Fegaxa.

Os membros da comisión delegada serán elixidos por e entre os integrantes da asemblea xeral.

Serán elixidos membros da comisión delegada os que obtenían maior número de votos ata cubri-lo número de membros correspondentes á comisión delegada.



Título VI Régime económico

Artigo 66º

A Fegaxa está sometida ó réxime d administración, ornamento e patrimonio propio e caixa única. O tesoureiro someterá á asemblea xeral ordinaria un balance de situación e as contas de ingresos e gastos e memoria económica, así como o orzamento para a tempada seguinte, balance e orzamento que lles deberán ser otificados á Dirección Xeral para o Deporte.

Non poderá aprobarse un ornamento deficitario agás autorización da Dirección Xeral para o Deporte. Tampouco poderán repartirse beneficios entre os seus membrs.

A Fegaxa elaborará unha memoria que analizará fielmente a actividade económica da Fegaxa, a súa adecuada actuación orzamentaria, o cumprimento dos obxectivos e os proxectos que se van desenvolver, e informará separadamente como mínimo sobre os seguintes aspectos:

1. Diferenciación dos ingresos e achegas segundo:

- a) Subvencións públicas.
- b) Subvencións, donativos ou achegas privadas.
- c) Ventas de activos.
- d) Ingresos procedentes de competicións organizadas.
- e) Ingresos para servicios prestados pola federación, permisos licencias e outros.
- f) Ingresos financeiros.

2. Tamén constará o destino da totalidade dos recursos, distinguindo como mínimo os grupos de custo ou investimentos seguintes:

- a) Administración da Fegaxa.
- b) Dirección e servicios da directiva, incluíndo viaxes.
- c) Competicións.
- d) Axudas a clubs e outras entidades.
- e) Axudas para actos deportivos.
- f) Construcións e outros inmovilizados.
- g) Formación de deportistas e técnicos.
- h) Deporte de elite e profesional.
- i) Árbitros.
- j) Órganos xurisdiccionais.

3. O importe das obrigacións de pagamento que compre satisfacer noutros exercicios que non estean previstos no balance.

4. O importe das garantías e os avais comprometidos.

5. A liquidación do orzamento, que explique as variacións en relación co ornamento aprobado na asemblea anterior.

As contas anuais e os orzamentos estarán no domicilio social da Fegaxa cunha antelación mínima de 15 días á data de celebración da asemblea xeral, ó dispor das persoas ou entidades con dereito a voto Nela, as cales poderán pedir copia que se lles deberá entregar antes da celebración da asemblea.



Artigo 67º

Constitúen os ingresos da Fegaxa:

- As subvencións ordinarias e extraordinarias da Xunta de Galicia ou as que outras entidades públicas poidan concederlle, así como as provenientes, se é o caso, da Fegaxa.
- Os bens ou dereitos que reciba por herdanza, legado ou doazón de persoas físicas ou entidades particulares, así como os premios que lle sexan outorgados.
- As cotas dos seus afiliados.
- As sancións pecuniarias que se lles imponhan ós seus afiliados dentro do exercicio da potestade disciplinaria.
- Os froitos, rendas e xuros dos seus bens patrimoniais.
- Os préstamos ou créditos que se lle concedan.
- Os beneficios que produzan as actividades e competicións deportivas que organice, así como os derivados dos contratos que realice.
- Calquera outro que poida serlle atribuído por disposición legal ou en virtude de convenio.

Artigo 68º

A Fegaxa destinará a totalidade dos seus ingresos e patrimonio á consecución dos fins propios do seu obxecto social.

Artigo 69º

A xestión económica ordinaria correrá a cargo do tesoureiro, Baixo a dirección do presidente, coidando das operacións de cobros e pagamentos. Autorizará coa súa sinatura, mancomunada coa do presidente, ou coa do vicepresidente autorizado, tódolos documentos de movementos de fondos. Será responsable de levar e custodiar os libros de contabilidade. Formulará os balances que anualmente deberán presentárselle á asemblea xeral para a súa aprobación.



Título VII Réxime documental

Artigo 70º

O réxime documental da Fegaxa comprenderá, como mínimo, os seguintes libros debidamente dilixenciados:

- a) Libro de rexistro de entrada e saída de documentos e comunicacións oficiais.
- b) Libro de rexistro de clubs no que constará a denominación destes, domicilio social e número de inscrición no Rexistro de Clubs, Federacións e Entidades Deportivas da Xunta de Galicia.
- c) Libros de actas, que consignarán as reunións que celebren tódolos órganos colexiados da Fegaxa, tanto de goberno e representación como complementarios e técnicos.
- d) Libros de contabilidade.
- e) Libro-inventario de bens mobes e inmobles.
- f) Rexistro dos membros da asemblea xeral e da comisión delegada no que deberán consta-los nomes dos titulares ou representantes legais e os domicilios para as citacións e comunicacións.
- g) Libro-rexistro de sancións disciplinarias. (Art. 32 R.D. 1591/1992, do 23 de decembro, de disciplina deportiva).

Artigo 71º

O réxime documental da Fegaxa estará a cargo do secretario, a quen lle corresponde a custodia dos libros da federación, redactar actas das reunións dos órganos colexiados e, unha vez aprobadas, asinalas co visto e prace do presidente, expedir certificacións, remiti-las certificacións e acordos que procedan á Dirección Xeral para o Deporte e, en xeral, prepara-la resolución e despacho de tódolos asuntos.

A Fegaxa, por requirimento da Dirección Xeral para o Deporte e nas condicións que esta determine, deberá someter a inspección o seu réxime documental.

En caso de ausencia ou imposibilidade física do secretario, as súas funcións serán desempeñadas polo propio presidente da Fegaxa ou pola persoa en que delegue.



Título VIII Régime disciplinario e xurisdiccional

Artigo 72º

A Fegaxa, en materia de disciplina deportiva, ten potestade sobre tódalas persoas que formen parte da súa estrutura orgánica, os clubs deportivos e os seus deportistas, técnicos e directivos, os xuíces e árbitros e, en xeral, todas aquelas persoas e entidades que, estando federadas, desenvolvan a actividade deportiva que constitúe o seu obxecto social no ámbito territorial da Comunidade Autónoma galega.

Artigo 73º

A potestade disciplinaria da Fegaxa rexerase polo disposto na Lei 10/1990, do 15 de outubro, do deporte; o Real decreto 1591/1992, do 23 de decembro, sobre disciplina deportiva; a Orde do 20 de xullo de 1995 que desenvolve o Decreto 228/1994 do 14 de xullo, regulador das federacións deportivas galegas; polos presentes estatutos e polo regulamento federativo que o desenvolve; e polo regulamento disciplinario da Federación Española de Xadrez.

Artigo 74º

Os órganos competentes en materia disciplinaria serán:

- En primeira instancia, un comité de competición ou xuíz único.
- En segunda instancia, un comité de apelación.

Ambolos dous órganos rexeranse por e aplicarán o disposto no Real decreto 1591/1992, do 23 de decembro, sobre disciplina deportiva, os presentes estatutos e a propia regulamentación federativa que os desenvolve. O comité de competición ou o xuíz único de competición estarán integrados por un número de membros entre 1 e 3. O comité de apelación estará integrado por 3 membros, nomeados e separados todos eles polo presidente da Fegaxa.

A composición destes comités serale comunicada a Dirección Xeral para o Deporte no forma prevista nestes estatutos.

Artigo 75º

As resolucións dictadas polo comité de apelación dentro das súas competencias terán carácter definitivo no ámbito deportivo da Fegaxa e contra elas poderase recorrer perante o Comité Galego de Disciplina Deportiva conforme a legislación vixente.



Título IX Da disolución da Fegaxa

Artigo 76°

A Fegaxa extinguirase polas seguintes causas:

- a) Por acordo da maioría de $2/3$ dos membros da asemblea xeral referendado, por maioría absoluta, por tódolos membros da Fegaxa a través de votación libre, directa e secreta.
- b) Polas demais causas que determinen as leis.

Unha vez producida a liquidación, o patrimonio neto destinarase ós fins de carácter deportivo que determine a Dirección Xeral para o Deporte.



Título X

Da aprobación e modificación dos estatutos e regulamentos federativos

Artigo 77º

A aprobación ou modificación dos estatutos e regulamentos da Fegaxa axustaranse ó seguinte procedemento:

1. Os estatutos e regulamentos da Fegaxa só poden ser aprobados e, se é o caso, modificados pola asemblea xeral, de acordo co establecido nos presentes estatutos e iniciárase por proposta do presidente ou do 25% dos membros da propia asemblea, agás cando esta fose por imperativo legal.
2. Os regulamentos da Fegaxa poden ser modificados pola comisión delegada por proposta do presidente ou dos 2/3 dos membros da comisión delegada. As modificacións non poderán exceder dos límites e criterios que a propia asemblea establezca.
3. Unha vez aprobados os estatutos, os regulamentos e as súas modificacións serán remitidos a Dirección Xeral para o Deporte para a súa retificación e aprobación definitiva.
4. Os estatutos da Fegaxa e as súas modificacións publicaranse no prazo máximo de dous meses a partir da súa aprobación pola Dirección Xeral para Deporte no Diario Oficial de Galicia.

Disposición común

Os termos e prazos establecidos nos presentes estatutos entenderanse referidos a días naturais.

Disposición transitoria

Considéranse integrados na Fegaxa tódolos clubs actualmente existentes, agás expresa manifestación en contrario.

Disposicións derradeiras

Primeira.- Quedan derogados os estatutos da Fegaxa ata agora vixentes, aprobados pola Secretaría Xeral para o Deporte da Xunta de Galicia o 22 de xuño de 1984.

Segunda.- Os presentes estatutos entrarán en vigor o día seguinte ó da notificación da súa aprobación pola Secretaría Xeral para o Deporte, sen prexuízo da súa posterior publicación no Diario Oficial de Galicia. Estes estatutos foron aprobados pola asemblea xeral extraordinaria, celebrada en Vigo o día 14 de xaneiro de 1996. Da que como secretario dou fe e prace do presidente.

Publicacións dos estatutos e modificación no D.O.G. :

DOG. Nº 75 de 17 de abril de 1996: publicación dos estatutos, aprobados na asemblea xeral extraordinaria, celebrada en Vigo o día 14 de xaneiro de 1996.

DOG. Nº 23 de 4 de febreiro de 1999: publicación da modificación dos estatutos, aprobada na asemblea xeral, celebrada o día 25 de outubro de 1998.

DOG. Nº 207 de 25 de outubro de 2004: publicación da modificación dos estatutos, aprobada na asemblea xeral, celebrada en Santiago o día 28 de marzo de 2004.

DOG. Nº 99 de 24 de maio de 2007: publicación da modificación dos estatutos, aprobada na asemblea xeral extraordinaria, celebrada en Vigo o día 30 de setembro de 2006.